

同治上海縣志

卷首

圖說

卷一

疆域

卷二

建置

重修上漢鯨

卷三十一

圖說一齊鉞

錄一

同治歲次
辛未刊于
吳門臬署

國子監藏書
宋文公集

補用府特用直隸州調補江蘇松江府上海縣正堂莫 爲

照送事照得本縣志書板片全部現因縣署房屋狹窄無從堆儲相應備文照送爲此照會

貴紳董請煩查收妥爲收藏以免損失望切須至照會者

計送縣志書板全部

照會

本縣儒學洒埽局紳董

光緒八年六月二十六日照會

是志初蒙應升憲在吳門臬署集資刊就越歲發還屬監理分修諸君重校將雜記遺事門增刪數則由局印行乃南園重校本也志板全部送縣弄藏瞬經十載莫邑侯發學堆儲查點損蝕補刊三卷四頁九百十七字十三卷三十二頁三百七十五字外嵌補一千二百九十三字補全刷印工料並製書架藏庋尊經閣等費司事墊出不另籌捐附記於此

光緒八年壬午十月

洒埽公局司事同啟

同治上海縣志序

同治五年余奉

命備兵上海時邑人士方有重修縣志之議余遂爲之設局延禮名賢分門編纂而余亦得以管見與諸先生參定之越四年書成乃爲之序曰縣之有志創於明洪武間顧或宏治間郭經成之其後鄭洛書顏洪範史彩李文耀范廷杰重修者五而嘉慶十七年李農部林松復編輯焉是爲嘉慶上海縣志旣成邑人陸慶循著嘉慶志修例一卷以訂其失迄今五十餘年兵燹頻經典文散佚若不及時蒐討慮愈久而文獻益無足徵故參稽諸志旁搜博采反覆究論擇善而從以成茲編凡三十四卷考郡縣志體例本於史部之地理其後乃附益以傳紀故古謂之圖經亦謂之圖志今首圖說而冠

疆域疆域定則建立城池官師以經理之故次建置先王體國經野首重明農而農事以水利爲最重堯舜之治天下命禹平水土定貢賦故次水道次田賦是皆地理之大綱也有土此有財有財此有用地理治而物產出焉故次物產孔門論政富之而加以教足民必繼以禮樂蓋本於堯命稷播百穀之後卽命契敷五教之意也故志物產卽繼以學校焉夫學校禮義相先之地古者始入學必釋奠於先聖先師後世學校中崇祀孔子爲萬世禮義之表歲進博士弟子員暨耆選侑生皆以襄祭也郡邑之祭莫大於孔子而他秩祀私祀次之故次祠祀舊志或以學校入建置不立專門又或以寺觀入祠祀與文廟並列謬矣有文事者必有武備故兵防次之先王經世之道有治法尤貴有治人故次表職官而傳名

宦官司得人而後人文興故次表選舉而志人物舊志人物分列傳獨行文苑隱逸諸門今遵

大清一統志之例但按時代序次不復分門而別以藝術流寓及列女次之人物之可法可傳者立言並於立德故藝文次之古蹟皆地以人傳故名蹟又次之舊志以第宅冢墓與壇廟並列失其序矣至於祥異非人事之經寺觀爲儒流所擯然五行志傳洛陽伽藍京師寺塔諸記古人固有爲之者亦博聞廣見之林也故類次於雜記教堂前志從芟恭攷欽定日下舊聞考城市門附載天主堂朱氏彝尊原書及帝京景物略

宸垣識略亦列之今類附於寺觀之末固其所也舊志列女之後並有方外傳似不倫惟顏志以仙釋入雜志最爲得體

今用其例取行義文學可紀者列寺觀之後亦類相從也其餘遺事雖不足入正志而有足資掌故備法戒者亦入雜記中俾邑人士無忘故老之所傳惟輕重大小本末先後之序則余與諸先生編次之微意也是編雖不盡同前人而前人纂修之功實不可沒故附錄舊序終焉書成會余移官蘇臬復質諸宮允馮先生桂芬稍加釐訂使先後體例斟酌盡一遂付梓人

同治十年三月布政使銜江蘇按察使前蘇松太兵備道永康應寶時序

同治上海縣志序

或曰今之上海非昔之上海也關津之所由財貨之所集他州別邑殊方異域之所萃而處形勢便利利用能以區區之地制粵寇之死命天下通都巖邑莫是過焉苟徒規規然排次舊聞記述陳迹不已固乎且於治術庸何補予曰是何言與聖人不易民而教知者不變俗而動故將自其變且易者而觀之則月異而歲不同自其不變不易者而觀之則無古今一也且事勢當大有變易之際正不可無不變不易者以主張維持之也志書固史之支流也觀往可以考來監前可以善後而惡乎訾諸夫天下治民之道富教而已富教之道使士農工商各事其事而已士者學習道藝可以居位者也農者播殖耕稼者也工者巧心勞手以成器物者也商者通四

方之貨者也上海自咸豐以來中外締交華裔錯處婆羅門教窟宅滋蔓邪說詖行視爲故常而士幾非昔之士峨舸大艦捆載百物販運往還萬里若咫而商幾非昔之商奇技異術盡態極妍人巧極而天工錯而工幾非昔之工且工商之勢積重其利什伯倍於農而農亦非復如昔之力於田其婦人女子亦將自荒其木棉之業如是則四民之職不盡廢乎雖然未嘗廢也天下之公卿大夫未有不始於爲士者士未嘗有能自外於先王之道而可命曰士者天下之大利未有不出於農者未有無農而得有工商者然則今之上海猶昔之上海也善爲政者核其疆域戶口察其地利士宜審其民情風教不爲徒善不爲徒法方將因其變易而求復其不變不易之道士信農敦工璞商慤女憧婦空空於以奏安攘之績

無難矣欲考來者必觀其往欲善後者必監於前上海志之修亦文獻之數得失之林也又曷可以已哉書勦始於同治丙寅維時今廉訪應公敏齋備兵蘇松太延請德清俞蔭甫桐城方存之二先生所纂四年而稿定公復請吳縣馮敬亭先生重加釐訂又一年而授梓予於己巳之秋繼公任樂觀是書之成也適奉

命按察楚南將去是邦邦人咸請曰不可無序予乃推原志之所以作歸諸古今之通義而言之至其與嘉慶志損益異同之處自有凡例詳之予可無贅云

同治十年辛未秋九月分巡蘇松太兵備道海關監督陞任湖南按察使司按察使六安涂宗瀛序

同治上海縣志凡例

一嘉慶志用顏志例分十門各附子目同時陸慶循著修例指摘其失亦多有見今參考折衷分門二十首圖說次疆域次建置次水道次田賦次物產次學校次祠祀次兵防次職官次名宦次選舉次人物次藝術次游寓次列女次藝文次名蹟次雜記而以舊序終焉

一嘉慶志之前在國朝有史志李志范志在明有郭志鄭志顏志當嘉慶志纂修時郭志久佚亦未見鄭志故所引但稱顏志舊志此次重修得見鄭志頗有採錄除嘉慶志所据舊志不另注餘皆一一注明

一修志者援据前志遞相沿襲間有并前志案語而亦襲之者此次重修凡於嘉慶志案語概用前志云以別之

一嘉慶志所列諸圖其鄉保區圖水道二圖華離輻輳不
便省觀今分浦東浦西鄉保區圖爲二圖南境北境水
道爲二圖眉目較清

一舊志疆域各圖多南上北下嘉慶志改爲北上南下改
之是也今從嘉慶志

一舊志皆載分野嘉慶志遵

高宗純皇帝御製題毛晃禹貢指南詩注詳言分野之說不
足信故刪去此門今仍之

一咸豐十年知縣劉郁膏覓得鄭志延寶山蔣敦復與舊
志參校異同作沿革表官司選舉表官績人物傳若干
卷今於各傳亦有采取沿革表全用原本不敢掠美
一舊志疆域門皆列形勝嘉慶志改附圖後不另立目考

庚申之難東南大局全恃滬濱一隅爲恢復根本蓋沿海險要之地實有足資控制者前志僅附圖後非體也今從舊志

一田賦新額田地米銀各數一依同治四年賦役全書開載閒有零數與減賦全案不合者在全書有覈正語茲不注明

一嘉慶志附物產於疆域陸氏修例譏之謂宜專立一門依江南通志題曰食貨此說是非參半通志食貨統括田賦戶口鹽法諸大政不得以物產一類當之今從陸氏專門之說而仍用舊志物產之名

一陸氏修例所譏前志如城署合爲一祠祀學校兵防不立門善堂義冢附寺觀皆有未安今從其說別爲門類

子目而亦有參酌其間如建置志之橋梁津渡併歸水道物異志之兵事附兵防祥異入雜記是也

一舊志職官選舉表俱注有傳字樣嘉慶志因各傳每卷有目表中概不注今則各傳列目而表中仍注有傳以便省覽

一嘉慶志人物分列傳獨行文苑隱逸諸門今遵 大清

一統志例概不分門但按時代編次而別出藝術流寓及列女焉

一人物既不分門凡一家之中父祖子孫咸以類聚惟代遠者另起

一分縣以前人物嘉慶志但采南青二志所遺者載之陸氏修例謂若以地斷自毋庸收一人若斷以時固宜悉